

RIJEČ UREDNIKA

Poštovani čitaoci, posebno nam je zadovoljstvo što smo u prilici vašoj čitalačkoj pažnji ponuditi novi broj *Kapije*, godišnjaka Behrambegove medrese u Tuzli. Moto naših pregnuća na planu izdavanja ovog godišnjaka sadržan je u izreci: *Što je zapisano ostaje, a što se pamti iščezne*. Pored radova profesora i drugih autora sadržanih u godišnjaku, nastojali smo sačuvati i informacije o radu Behrambegove medrese između dva broja: realiziranim projektima, manifestacijama, postignutim rezultatima u učenju i vladanju naših učenika te drugim aktivnostima. S obzirom da vremenska distanca briše određene tragove, a da određenim dokumentima daje vrijednost, očekujemo da će protokom vremena informacije i radovi sadržani u našem godišnjaku biti dragocjeni izvori informacija budućim istraživačima odgojno-obrazovnog procesa u bosanskohercegovačkim medresama. Bošnjaci su, za razliku od nekih ranijih perioda, zahvaljujući prije svega nezavisnosti i slobodi koju su skupo platili, u dobroj mjeri u posljednjih nekoliko decenija promijenili svoj odnos prema nauci i pisanoj riječi.

U 5. broju *Kapije* sadržane su teme iz sljedećih naučnih oblasti: psihologije, pedagogije, fikha (islamskog prava), sociologije kulture, bošnjačke književnosti, fizike i biologije. Intelektualni

opus profesora Behram-begove medrese je impozantan, a posebno dolazi do izražaja kada je sublimiran i predstavljen na jednom mjestu. Ovaj broj godišnjaka, ali i brojni radovi objavljeni u drugim publikacijama, plodovi su ambicije i entuzijazma, istraživački istančanog duha naših profesora. U radu *Hafizi Behram-begove medrese* čuvamo trag o hafizima među učenicima i diplomantima promoviranim u periodu između dva godišnjaka.

Pored radova profesora i drugih autora, godišnjak sadrži i izvještajni dio, u kojem su predstavljeni rezultati učenika u učenju i vladanju na kraju školske godine, rezultati postignuti na takmičenjima organiziranim za učenike medresa i drugih srednjih škola, te su prezentirane najznačajnije aktivnosti u oblasti javne i kulturne djelatnosti škole koje su realizirane u školskoj 2017/18. i 2018/19. godini. Na kraju drugog dijela sadržani su osnovni podaci o maturantima koji su školovanje okončali u školskoj 2017/18. i 2018/19. godini.

U bošnjačkoj književnosti, u njenim različitim historijskim periodima, mnogo je sadržaja koji oplemenjuju, bude emocije, šire duhovne i intelektualne vidike. Sadržaj rada *Čuvari vremena - intertekstualnost 'Ljetopisa' Mula Mustafe Bašeskije* je veoma poticajan u ovom pogledu.

Zahvaljujemo se autorima koji su napisali radove za ovaj broj *Kapije* i tako doprinijeli njenom publikovanju. Posebno zahvaljujemo Vama, poštovani čitaoci, koji svojim sugestijama doprinosite podizanju stepena kvaliteta *Kapije*, godišnjaka Behram-begove medrese.

Otvaram ovu svesku izrekom koju je zapisao sarajevski ljetopisac Mula Mustafa Bašeskija: *Što je zapisano ostaje, a što se pamti iščezne.*

Urednik